

Huet

I.

Pensis d'Amors vueil retraire
Comment li miens cuers me maine,
Qu'a son plaisir m'estuet faire
Ce dont j'ai enui et paine;
Trop me fait ma dolor plaie,
S'en tieig Amor a vilaine
Qui m'ocit en son servise,
Que toz sui a sa devise.

II.

Ma dolor me convient taire
Et servir Amor certaine,
Car toz mes pensers repaire
A estre li suens demaine.
Se cele m'est debonaire,
Qui de toz bons sens est plaine,
Tel joie avroie conquise,
Qui ja n'iert par moi requise.

III.

Amors dechiet et empire
Par fause gent noveliere;
Por ce en trai grief martire
Que siens sui a ma maniere.
On ne porroit pas bien dire
Si grant dolor en priere,
Com el s'est en mon cuer mise,
De li amer, sens feintise.

IV.

Ma volentez tret et tire
La ou l'on la tient moins chiere;
Mes ne me soi escondire
De rienz qu'Amors me requiere.
Je cuit qu'or me vuet ocire
D'esperance mençongiere;
Mais a servir l'ai emprise;
Sel ferai jusqu'au jüise.

V.

De li ne partirai mie,

Por ennui ne pour pesance;
Et cil qui plus m'en chastie
Ne vuet pas ma delivrance,
Qu'Amors a grant seignorie,
Sol de membrer sa semblance.
Por ce sui en son servise,
Ja m'en a joie promise.

VI.

Mon cuer ai en sa baillie;
Mal fera, s'el ne m'avance;
Ne ja por riens que nuns die
N'avrai aillors ma fiance;
Ains morrai, s'el ne m'aïe,
En ceste longue atendance.
Servir la vueil a sa guise,
Tant qu'Amors l'ara esprise.

VII.

Odins, lonc tens l'ara quise
Gasçoz qui tant l'aime et prise.

- letto 278 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/huet-37>